

Kiel ni ludas?



Ludoj estas sendube parto de la homa kulturo, kaj la rilatoj al ludoj en diversaj landoj estas malsamaj. **KONTAKTO** komune kun la projekto Interkulturo preparis etan demandaron pri ludoj en diversaj landoj. Kaj jen la rezultoj!



Mi preferas vidi la vizaĝojn de miaj kontraŭludantoj!

Chuck, Usono

- *Kiuj pensoj aperas en vi, kiam vi aŭdas la vortojn "ludi, ludoj"?*

- Tabul-ludoj kaj lokaj kluboj.

- *Kial homoj interesiĝas pri tabul-ludoj?*

- Mi persone ŝatas ilin, ĉar tio estas maniero ekzerci mian cerbon kaj inter-agi kun veraj homoj (malsame kiel en video-ludoj). Por ludantoj, la "popularaj ludoj", kiel *Monopoly* [monopoli] kaj *Risk*, ne estas interesaj, ĉar ili ne havas sufiĉe da **strategio**. Tamen, inter neludantoj ili jes ja estas la plej popularaj. Krome, en tabul-ludoj (same kiel en ajnaj ludoj) certe estas **defio!**

- *Kiel popularaj estas tabul-ludoj nuntempe en la mondo?*

- Ne tre popularaj, sed multe pli popularaj ol antaŭ dek jaroj, pro du kialoj: unue, post la apero de *Siedler von Catan* (**Koloni-antoj** de Katan) homoj pli interesiĝis pri *veraj* strategiaj ludoj; kaj due, same kiel pri Esperanto, oni nuntempe povas trovi pli bonajn informojn pri tabul-ludoj en la **interreto**.

- *Ĉu ekzistas landoj, en kiuj tabul-ludoj estas pli popularaj ol en aliaj?*

- Certe! Sed mi ne vere scias kial...

- *Kion vi opinias pri komputilaj ludoj?*

- Mi preferas vidi la vizaĝojn de miaj kontraŭludantoj, do mi ludas ĉefe tabul-ludojn. Eĉ se tamen kelk-foje mi ludas *Flash*-ludojn en la interreto por amuziĝi.

- *Kaj sport-ludoj? En Usono kelkaj specoj de ili estas aparte popularaj, ĉu ne? Almenaŭ tiun imagon oni ricevas pro ofta montrado de korbo-pilko-turniroj...*

- Mi terure malŝatas korbo-pilkon, sed mi ne estas kutima usonano... Mi plej ŝatas tablo-**tenison**, sed sendube korbo-pilko estas la plej populara sporto en Usono*.



Litovoj elektas korbo-pilkon!

Neringa, Litovio

- *Kiuj pensoj aperas en vi, kiam vi aŭdas la vortojn "ludi, ludoj"?*

- Amuziĝo.

- *Kiaj ludoj estas popularaj en via lando?*

- Se paroli pri sportaj ludoj – korbo-pilko. Niaj ludistoj iĝis sufiĉe famaj kaj nuntempe ili estas eĉ preskaŭ la plej lertegaj en la tuta mondo.

- *Kial ĝuste korbo-pilko? Kial ne pied-pilko, ekzemple?*

- Mi supozas, ke eble pro tio, ke Litovio estas malgranda, kaj ne estas multaj grandaj ejoj por ludi pied-pilkon (*ridetas*). Kaj krome, Litovio estas lando de pluvo: ne ĉiam estas kondiĉoj por ludi pied-pilkon ekstere. Ah jes, ankoraŭ unu kialo: litovoj estas altaj homoj!

Por multaj, komputil-ludoj estas drogo...

Haris, Bosnio kaj Hercegovino

- *Kiuj pensoj aperas en vi, kiam vi aŭdas la vortojn "ludi, ludoj"?*

- Ludoj per vortoj kun knabinoj kaj poste amuzaj komunaj ludoj ekstere.

- *Kiaj ludoj estas popu-*

laraj en via lando?

- Sufiĉe multaj homoj el mia lando (eble eĉ la plejparto) ŝatas kart-ludojn.

- *Kial?*

- Mi kredas, ke oni ĉiam serĉis ludojn, kiujn oni povas ludi hejme, apud fajro, sed kial ĝuste kartoj, mi ne scias... Certe iam oni havis kelkajn tradiciajn ludojn kaj ne ludis kartojn. Ekzemple, ekzistis ludo nomata "ĉapelo", en kiu iu kaŝas ies **ringon** sub unu el multaj ĉapeloj kaj divenas, kie ĝi estas.

- *Kaj el sportludoj, kiu plej popularas en via lando?*

- Plejparte la pilkoludoj, kio signifas unuavice pied-pilko. Kaj ankaŭ kelkaj tradiciaj – ekzemple, ŝtonĵetado aŭ ŝnureg-tirado.

- *Kion vi mem ludas?*

- Interretajn ludojn ĉefe. Sed ĝenerale mi ne ludas multe kaj ofte. Do, tio okazas en la momentoj, kiam mi ne povas plu labori, kaj restas nur mi kaj mia komputilo. Se mi estas kun miaj amikoj, mi ne volas "perdi" la tempon ludante kun ili – mi preferas promeni aŭ kafumi. Do, mi ludas sole kaj per komputilo. Estas iusence ripozo: ludante, mi devas **koncen-**



triĝi, kaj ne povas pensi pri ĉiu-tag-ajoj...

- *Ĉu vi opinias, ke multaj homoj ludas komputil-ludojn pro la samaj kialoj?*

- Hm... mi certas, ke multaj ludas ilin, sed mi kredas, ke tio estas **drogo** por la plejparto, ĉar oni ne plu scias, kiam ĉesi...

- *Kial, laŭ vi, komputil-ludoj tiel populariĝis tra la tuta mondo? Ĉu vi supozas, ke ili trafas ion en la homa menso, kio*

estas universala? Kaj se jes – kio estas tio?

- La vivo hodiaŭ fariĝas sufiĉe "malhomeca" – oni perdas rilatojn kun aliaj homoj. Ekzemple, por sportumi jam necesas eliri el la domo, pretigi sin kaj kontakti aliajn homojn... Sed ekzistas pli nestreĉa maniero – sufiĉas nur perdi iom da tempo apud la komputilo...

- *Kio por vi pli gravas: la celo aŭ la ludo mem?*

- La ludo mem estas ĉiam pli grava. Mi ŝatas, se homoj ĉirkaŭ mi amuziĝas kaj speciale se ili ridas. Sed mi devas konfesi, ke mi ne ŝatas malgajni, aparte se estas "peza" malgajno...



99% da viroj ne kapablas paroli pri io alia krom pied-pilko...

Daniela, Italio

- *Ĉu estas, laŭ vi, iu ludo, kiu estas aparte populara en via regiono? Kaj se jes – kiu?*

- Rilate sporton, certe estas, kaj ĉiuj scias: pied-pilko! Tio estas **koŝmaro** por mi, ĉar 99% da viroj ne kapablas paroli pri io alia. Kvankam kun granda surprizo pasint-jare mi rimarkis, ke ankaŭ en Germanio pied-pilko estas same populara kaj ĉiea en la ĉiu-taga vivo...

Se paroli pri aliaj ludoj, estas sufiĉe amuzaj tiuj, kiujn oni organizas dum popularaj festoj en la kamparo. Ekzemple, kiam oni devas diveni la pezon de **porko** aŭ ŝafo (viva, kompreneble...).

Aŭ alia: oni ligas dehakitan **trunkon** de arbo al la branĉoj de du aliaj arboj per ŝnuroj tiel ke ĝi pendu iom super la tero (horizontale) kaj ke ĝi povu svingiĝi, kiam oni paŝas sur ĝi. Poste oni malsekigas ĝin

per akvo kaj sapo... Venkas tiu, kiu kapablas atingi la alian finon de la trunko.

- *Kion vi opinias pri tabul-ludoj kaj kart-ludoj? Ĉu vi foje ludas ilin mem?*

- Mi povus rakonti dum horoj... Ni ludas ĉefe tiajn ludojn ĉe la maro aŭ en la kamparo. Ĉe mi oni ĉiam organizas somerajn turnirojn de diversaj kart-ludoj.

- *Kial, laŭ vi, tabul-ludoj kaj kart-ludoj estas tiel popularaj?*

- Pro diversaj kialoj. Por mi, kart-ludoj unue estas mal-streĉ-igaj tempo-pasig-iloj: kvankam oni devas koncentriĝi (se la ludo postulas iom da strategio), oni uzas sian energion por la ludo kaj forgesas pri aliaj aferoj. Dume vi povas paroli, ŝerci, simple pasigi agrablan tempon kun aliaj homoj, sen celo...

- *Kio por vi pli gravas: la celo aŭ la ludo mem?*

- Certe, pli gravas por mi la ludo mem. Sed ne ĉiam: foje bonas ankaŭ ludi nur por venki.

Intervjuis Katja IGNATJEVA, Rusio/Svedio

* Korbo-pilko sendube estas treege populara, aparte en la nord-oriento, en urbaj lokoj kaj inter nigroluj, sed se konsideri la tutan landon, la plej populara estas aŭ usona pied-pilko aŭ bazo-pilko. En la sud-oriento, usona pied-pilko estas la plej populara sporto – Joel Amis, vicred. (Usono/Nederlando)

defii – diri, ŝajniĝi ktp., ke li/si povas superi aliajn
drogo – dependiga aĵo, kiu iel efikas mensan funkciadon
interreto – aro da interligitaj komputiloj

kolonianto – tiu, kiu okupas teritoriojn ekster sia hejmlando
koncentriĝi – pensi nur pri unu afero

korbo-pilko – pilko-sporto; korbo – ujo kun truetoj
koŝmaro – malbona sonĝo; ĉi tie: terurajo

porko – kampara besto ofte uzata por viando

ringo – iuj portas ilin sur la fingroj

strategio – la arto paŝon post paŝo akiri venkon

teniso – speco de sporto ludata per eta pilko

trunko – la plej dika parto de arbo

turniro – sporta "batalo"